

मार्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै विजय बजाज।

Headlines

1. प्रधानमंत्री नरेन्द्र मोदी होरें आखेआ ऐ जे भारत ते ब्राजील आतंकवाद गी बिंद बर्दाश्त नेई करने ते आतंकवाद गी लेइयै दोहरे मापदंड अपनाने दे खलाफ इकजुट होइयै मजबूती कन्नै खड़ोते दे न।
2. श्री अमरनाथ जी दी गुफा च मत्था टेकने आहले श्रद्धालुएं दी गिनतरी पैहले 6एं दिनें दरान 1 लक्ख दे आंकड़े गी पार करी गेआ ऐ। 7 जहार 500 शा मते अमरनाथ श्रद्धालुएं दा 8मां जत्था अज्ज बडलै जम्मू थमां कश्मीर घाटी लेई रवाना होआ।
3. जंगलात मंत्री जावेद अहमद राणा होरें जंगली जीएं-जैतूएं दे संरक्षण दी दिशा च केई नमीं पैहलकदमिं दा ऐलान कीता ऐ। उंनै वन्यजीव शोध ते सिखलाई केन्द्र दा उद्घाटन कीता।
4. मुख सचिव अटल डुल्लु होरें श्रीनगर च औंदी 26 ते 27 जुलाई गी होने आहले राज्य कानूनी सेवा प्राधिकरणें दे 8में उत्तर जोन इलाकाई सम्मेलन लेई तैयारिं दा जायजा लैता।
5. जम्मू संभाग च आतंकवाद दी मारै हेठ आए दे पीड़ित लोकें लेई इक समर्पित हेल्पलाईन दा ऐलान कीता गेआ ऐ। हून खबरें दी तफसील कन्नै जगमोहन शर्मा।

<><><><><><>

PM-terrorism

प्रधानमंत्री नरेन्द्र मोदी होरें आखेआ ऐ आतंकवाद खलाफ लड़ाई गी लेइयै भारत ते ब्राजील दी सोच इक्के नेई ऐ ते एह सोच आतंकवाद गी बिंद बर्दाश्त नेई करने ते आतंकवाद गी लेइयै दोगलापन अपनाने दे खलाफ बी ऐ। उंनै आखेआ जे दौनें मुखें दा एह मनना ऐ जे आतंकवाद खलाफ लड़ाई च कुसै बी किस्मै दे दोहरे मापदंडें दी कोई थाह नेई ऐ। श्री मोदी होरें आखेआ जे भारत ते ब्राजील, हर चाल्ली दे आतंकवाद ते उसी समर्थन देने आहलें दी सख्ती कन्नै निंदेआ करदे न। ब्राजील दे राष्ट्रपति लुइज़ इनासियो लूला डी सिल्वा हुं'दे कन्नै डेलीगेशन स्तरै दी गल्लबात परैन्त प्रेस लेई जारी इक बयान च प्रधानमंत्री होरें एह गल्ल आखी। उंनै गलाया

Amarnath-Yatra

श्री अमरनाथ जी दी जातरा पूरे श्रद्धाभाव कन्नै पूरी चाल्ली रमानदारी ते बवस्था आहले ढंगगै सिर चलै करदी ऐ। कल कुल 18 जहार 633 श्रद्धालुएं दे पवित्र गुफा च दर्शन करने दे कन्नै गै पैहले 6एं दिनें च गै पवित्र गुफा च दर्शन करने आहलें दी गिनतरी 1 लख दा आंकड़ा पार करी गई ऐ। कल शामी तगर दर्शन करने आहलें दी गिनतरी 1 लख 11 जहार 974 पुज्जी गई ही। इस मौके पर उपराज्यपाल मनोज सिन्हा होरें खुशी प्रगट करदे होई आखेआ.....

तोआई, सख्त सुरक्षा बंदोबस्तें हेठ अज्ज बड़लै जम्मू थमां 7 जहार 579 श्रद्धालुएं दा इक होर जत्था 302 गड़िणं दे काफले च कश्मीर घाटी लेई खाना होआ जेदे च 5 जहार 719 मर्द, 1 जहार 577 महिलां, 40 न्याणें, 167 साधु ते 76 साध्वियां शामिल न जिंदे चा 3 जहार 31 श्रद्धालु बालटाल ते 4 जहार 548 श्रद्धालु पहलगाम आहले रस्तेयां जातरा करडन। जातरा गी लेइयै श्रद्धालुएं च बड़ा मता उत्साह दिखने गी लब्बा करदा ऐ।

Security-Review

3 जुलाई गी शुरू होई दी श्री अमरनाथ जी दी जातरा दौरान सुरक्षा ते बवस्था बनाई रखने लेई कीते गेदे इंतजामें दी समीक्षा लेई कल कश्मीर दे पुलस महानिरीक्षक ते डी.आई.जी मध्य कश्मीर हुंदे सने होर केई सीनियर अफसरें गी कन्नै लेइयै जम्मू-कश्मीर दे पुलस महानिदेशक नलिन प्रभात होरें जातरा दे बालटाल रस्ते पर सुरक्षा दा व्यापक जायजा लैता। उच्ची सतह दी इस टीमैं उत्थे तैनात पुलस ते होरनें सुरक्षा कर्मिणं कन्नै गल्लबात कीती ते उत्थे निगरानी गितै लोइचदे उपकरणें ते होर दुए साज-समेयान दी स्थिति दा बी जायजा लैता। इस दौरान उनें सुरक्षा ते सिविल एजेंसिणं बश्कार तालमेल बनाई रखने दी बवस्था दा बी मुआयना कीती। तोआई सी.आर.पी.एफ दे महानिदेशक जे.पी सिंह होरें बी कल गै जम्मू थमां श्रीनगर तोड़ी दे रस्ते पर सुरक्षा बवस्थाएं दा मुआयना कीता। रामबन जिले दी चंदरकोट थाहर सी.आर.पी.एफ दे महानिदेशक होरें जम्मू-कश्मीर पुलस ते केंद्री थेआरबंद बलें दे अधिकारिणं कन्नै बी गल्लबात कीती ते सुरक्षा गिड ते होर दुए सुरक्षा इंतजामें दा जायजा लैता।

अमरनाथ दी जात्रा पर आए दे श्रद्धालुएं दी सेहत दिक्खभाल लेई आयुष विभाग रामबन नै जम्मू-कश्मीर सरकार दे सहयोग कन्नै रामबन जिले च जात्रा रस्ते पर मेडिकल सहायता कैंप लाए देन। जात्रा निवास चंदरकोट ते लम्बर ग्राउंड कश लाए गेदे इन्ने कैंपें च जात्रां दी डाक्टरी जांच, डाक्टरी सलाह ते आम निक्की-मुट्टी बमारिएं लेई दोआइयां बी मुफ्त दितियां जा करदियां न। एहदे अलावा इन्ने कैंपें च योग करोआने दे विशेष सत्र लोआए जंदे न ते लोकें गी जात्रा दौरान साफ-सफाई, केह खाना केह नेई खाना, अपनी सेहत दिक्खभाल कियां करनी वगैरा दे बारे च बी पूरी जानकारी ते एहतियात बारें बी दस्सेआ जंदा ऐ। इस बारें आकाशवाणी समाचार कन्नै गल्ल करदे होई सीनियर मेडिकल अफसर ते योग दे जिला तालमेल अफसर डॉ. मसूदर जरगर होरें दस्सेआ।

<><><><><><>

ते हुन बाकि दिए खबरें कन्नै विजय बजाज।

Forest-Min.

जंगलात मंत्री जावेद अहमद राणा होरें जम्मू-कश्मीर च ट्रैकिंग आहले 18 नमें रस्ते गी शुरू करने ते वन्यजीवें गी सुरक्षित बचाने सरबन्धी 5 केन्द्रें गी औपचारिक मान्यता देने सने जंगली जीएं-जैतुएं दे संरक्षण दी दिशा च केई नमीं पैहलकदमिएं दा ऐलान कीता ऐ। मंत्री होरें प्रदेश च वन्यजीवें लेई संरक्षित इलाकें दे रक्ख-रखाs दे कम्मैं च शानदार उपलब्धियां हासल करने लेई वन्य जीवें सरबन्धी मैहकमे दे ऐहलकारें ते अमले गी सम्मानित करने लेई डाचीगाम नेशनल पार्क च आयोजित इक कार्यक्रम दरान बोला करदे हे। मंत्री होरें कुदरती विरासत गी राक्खी ते पर्यावरण दे मुआफिक सैलसफा गी बढ़ावा देने सने जैविक बन्न-सबन्नता दी निगरानी ते जंगली जीएं-जैतुएं दी कुदरती रिहायश आहले इलाकें गी नमें सिरेया तैयार करने दी जम्मू-कश्मीर सरकार दी वचनबद्धता गी फही पक्का कीता। इस मौके पर उ'ने वन्य जीवें सरबन्धी शोध ते सिखलाई केन्द्र दा उद्घाटन कीता। एहदे अलावा उ'ने सरबन्धत अधिकारिएं लेई वन्य जीवें सरबन्धी कानून बारें इक ध्याड़े दे लाजमी सिखलाई कोर्स गी बी शुरू करोआया।

<><><><><><>

CS-North Zone Conf.

मुख्य सचिव अटल डुल्लु होरें श्रीनगर च औंदी 26 ते 27 जुलाई गी होने आहले राज्य कानूनी सेवा प्राधिकरणें दे 8में उत्तर ज़ोन इलाकाई सम्मेलन लेई तैयारिएं दा जायजा लैता। बड़ी मती प्रतिश्ठा आहले इस कार्यक्रमैं च भारत दे प्रधान

न्याऽधीश, केन्द्री कानून मंत्री, बक्ख-बक्ख हाईकोर्ट दे मुख् न्याऽधीश ते आला दर्जे दे कानूनी ऐहलकार बी हिस्सा लैडन। इस सम्मेलन दिएं मुख् झलकिं च श्रीनगर दे एस.के.आई.सी.सी. च होने आहला उद्घाटनी सत्र ते हारवन च जनजातीय समुदाऽ दे लोके लेई आयोजित कीता जाने आहला इक बड्डा कानूनी जागरूकता कैप मुख् तौर पर शामिल न। बैठक दरान मुख् सचिव होरे सभ्भने मुतल्लका मैहकमे गी हिदायत दिती जे ओह् इस कार्यक्रमै लेई गणमान्य लोके दे रोहने-बोहने, उंदी आओजाई, सुरक्षा ते होरने गतिविधिं लेई लोडचदे सभ्भे बंदोबस्त अगेत्रे गै जकीनी बनाई लैन।

<><><><><><>

Helpline No.

एस.आर.ओ 43 आर.ए.एस तैहत लाह् सखल्ले ते बवस्था आहले ढंगै सिर पुजाना यकीनी बनाने लेई जम्मू दे डिविजनल कमिशनर हुंदे आसेआ आतंकवाद प्रभावित लोके दी स्थूलत लेई इक हैल्पलाइन नंबर जारी कीता ऐ। एह नंबर ऐ 0191-2478995.. इस नंबर पर जम्मू संभाग दे बकाया पेदे मामले दे सिलसिले च शकैते गी दूर करने, जरूरी जानकारी हासल करने ते लोडचदी मदद ते मार्गदर्शन सरबन्धी सहयोग दिता जाग। इस पैहल दामकसद प्रशासन ते प्रभावित परोआरे बशकार संचार बवस्था गी तरतीब देना ऐ तां जे प्रभावित परोआरे गी बिजन कुसै दिक्कत-परेशानी दे एसआरओ-43 आरएएस दा लाह् हासल होई सकै। लोके गी सलाह दिती जंदी ऐ जे ओह् इने मामले सरबन्धी अपने कुसै बी मसले दे हल लेई इस नम्बरै पर संपर्क करन।

<><><><><><>

Read by: Vijay Bajaj and Jagmohan Sharma

D.E.O : Varinder Kumar

Editor : Abhilasha Sharma